

Salomo  
40. jar König vber  
Israel.

WAS aber mehr von Salomo zu sagen ist / beide sein erstes vnd sein 3. Reg. 11. letztes / Sihe / das ist geschrieben in der Chronica des Propheten Nathan / vnd in den Propheceien Ahia von Silo / vnd in den Gesichten Jeddi des Schawers wider Jerobeam den son Nebat. Vnd Salomo regierte zu Jerusalems vber ganz Israel vierzig jar. Vnd Salomo entschieff mit seinen Vettern / vnd man begrub in in der stad David seines vaters / Vnd Rehabeam sein son ward König an seine stat.

X.

Rehabeam.



Rehabeam zoch gen Sichem / Denn ganz Israel war gen Sichem 3. Reg. 12. komen in König zu machen. Vnd da das Jerobeam höret der son Nebat / der in Egypten war (da hin er fur dem König Salomo geflohen war) kam er wider aus Egypten. Vnd sie sandten hin / vnd liessen im ruffen / Vnd Jerobeam kam mit dem ganzen Israel vnd redeten mit Rehabeam / vnd sprachen / Dein vater hat vnser Joch zu hart gemacht / So leichtere nu du den harten Dienst deines vaters / vnd das schwere joch / das er auff vns gelegt hat / So wollen wir dir vnterthenig sein. Er sprach zu jnen / Vber drey tage komet wider zu mir / Vnd das Volck gieng hin.

WAD der König Rehabeam ratfraget die Eltesten die fur seinem vater Salomo gestanden waren / da er beim leben war / vnd sprach / Wie ratet jr / das ich diesem volck antwort gebe? Sie redeten mit im / vnd sprachen / Wirstu diesem volck freundlich sein / vnd wirst sie handelen gütiglich / vnd jnen gute wort geben / So werden sie dir vnterthenig sein allewege.

ER aber verlies den rat der Eltesten / den sie im gegeben hatten / vnd ratschlug mit den Jungen die mit im auffgewachsen waren / vnd fur im stunden / vnd sprach zu jnen / Was ratet jr / das wir diesem volck antworten / die mit mir geredt haben / vnd sagen / Leichtere das joch das dein Vater auff vns gelegt hat? Die Jungen aber die mit im auffgewachsen waren / redeten mit im / vnd sprachen / So soltu sagen zu dem volck / das mit dir geredt hat / vnd spricht Dein vater hat vnser joch zu schwer gemacht / Mach du vnser joch leichter / vnd sprich zu jnen / Mein kleinster Finger sol dicker sein / denn meins vaters Lenden. Hat nu mein Vater auff euch zu schwere joch geladen / So wil ich ewrs jochs mehr machen / Mein vater hat euch mit Peitschen gezüchtiget / Ich aber mit Scorpion.

ALS nu Jerobeam vnd alles volck zu Rehabeam kam am dritten tage / wie denn der König gesagt hatte / komet wider zu mir am dritten tage / antwortet jnen der König hart. Vnd der König Rehabeam verlies den rat der Eltesten / vnd redet mit jnen nach dem rat der Jungen / vnd sprach / Hat mein vater ewre joch zu schwer gemacht / So wil ichs mehr dazu machen / Mein vater hat euch mit Peitschen gezüchtiget / Ich aber mit Scorpion. Also gehorchet der König dem volck nicht / Denn es war also von Gott gewand / Auff das der HER sein wort bestetiget / das er geredt hatte durch Ahia von Silo zu Jerobeam dem son Nebat.

DA aber das ganze Israel sahe / das jnen der König nicht gehorchet / antwortet das volck dem Könige / vnd sprach / Was haben wir teils an David / oder erbe am son Isai? Jederman von Israel zu seiner Hütten / So sihe nu du zu deinem hause David. Vnd das ganze Israel gieng in seine Hütten / das Rehabeam nur vber die kinder Israel regierte / die in den Iedten Juda wonen. Aber der König Rehabeam sandte Hadoram der Rentmeister / Aber die kinder Israel steinigeten in zu tod / Vnd der König Rehabeam steig frisch auff seinen wagen / das er flöhe gen Jerusalem. Also fiel Israel abe vom hause Davids bis auff diesen tag.

Hadoram  
gesteiniget etc.  
Abfall  
Israels von Ju  
da.

VND